



Trwy e-bost

Jayne Bryant AS
Cadeirydd y Pwyllgor Plant, Pobl Ifanc ac Addysg

1 Awst 2022

Annwyl Jayne

Diolch am eich llythyr dyddiedig 6 Gorffennaf 2022 ynglŷn ag arholiadau'r haf. Er i chi ofyn am ymateb erbyn 7 Medi, roeddwn yn meddwl y byddai'n ddefnyddiol rhoi diweddariad interim i chi ar y materion yr ydych wedi'u hamlinellu. Byddwn yn darparu ymateb llawn erbyn 7 Medi, ar ôl i CBAC ystyried yr holl faterion a godwyd yn eu cyfarfodydd dyfarnu y byddwn ni'n arsylwi arnynt. Rydym yn nodi eich bod hefyd wedi anfon llythyr tebyg at CBAC ac felly byddwn yn nodi ein rolau'n glir mewn perthynas â'r materion hyn.

Er mwyn cefnogi dysgwyr a chydnabod effaith barhaus y pandemig ar eu haddysg, rydym wedi ei gwneud yn ofynnol i CBAC wneud addasiadau i'w cymwysterau a mabwysiadu ymagwedd wahanol at raddio haf 2022. Rhoddwyd yr addasiadau ar waith ym mis Gorffennaf 2021 er mwyn ffocysu paratodau'r dysgwr ar gyfer asesiadau haf 2022 (arholiadau ac asesiadau di-arholiad). Y disgwyl oedd y byddai ysgolion a cholegau'n ymdrechu i addysgu cynnwys y cwrs llawn, gan fod yn ymwybodol o'r hyn y byddai'r arholiadau ac asesiadau eraill yn canolbwyntio arno. Oherwydd y cynnydd sylweddol mewn canlyniadau yn 2020 a 2021 pan oedd trefniadau asesu amgen yn eu lle, ystyriwyd gwneud symudiad teg yn ôl i'r canlyniadau cyn y pandemig. Mae'r dull graddio'n ffordd o bontio'n ôl i'r safonau sefydledig yn y blynyddoedd i ddod, tra eleni, bydd canlyniadau ar lefel pwnc cenedlaethol tua hanner ffordd rhwng canlyniadau 2019 a 2021.

Fel y nodwyd gennych yn eich llythyr atom, rydym wedi siarad â chi am rai o'r materion sydd wedi codi ynglŷn â phapurau arholiad yr haf hwn. Bydd CBAC fel 'perchennog' y cymwysterau yn arwain y gwaith o ymchwilio i faterion o'r fath ac yn nodi'r camau i'w cymryd er mwyn sicrhau nad yw dysgwyr o dan anfantais oherwydd y materion hyn. Maent yn adrodd ar y mater i ni ac yn amlinellu'r camau gweithredu y byddant yn eu cymryd, a byddwn ninnau wedyn yn eu monitro. Mae CBAC hefyd yn cynnal ymchwiliadau dadansoddi i fynd at wraidd y broblem lle nodir gwallau ac yn rhoi trosolwg i ni o'r achos a'r hyn a fydd yn cael ei roi ar waith er mwyn atal digwyddiad tebyg rhag digwydd eto. Unwaith eto, rydym yn monitro'r cynlluniau gweithredu hyn.

Qualifications Wales

Q2 Building, Pencarn Lane
Imperial Park,
Casnewydd
NP10 8AR
☎ 01633 373 222



www.cymwysteraucymru.org

Cymwysterau Cymru

Adeilad Q2, Lôn Pencarn
Parc Imperial
Casnewydd
NP10 8AR
☎ 01633 373 222

Eleni bu cwynion i CBAC, i ni ac yn y cyfryngau'n ehangach am rai addasiadau, a mynegwyd barn bod cwestiynau penodol neu rannau o gwestiynau a ymddangosodd ar bapurau arholiad o bynciau a oedd wedi'u tynnu o'r gofynion asesu. O'n holiadur Dweud Eich Dweud rydym hefyd wedi gweld safbwyntiau rhai dysgwyr, rhieni ac athrawon lle mae pryderon tebyg wedi'u codi ochr yn ochr â sylwadau cyffredinol am ofynion rhai o'r papurau. Rydym wedi cyhoeddi adroddiad interim ar yr ymatebion rydym wedi'u gweld a'r camau a gymerwyd hyd yn hyn:

<https://qualificationswales.org/media/8560/dweud-eich-dweud-ar-arholiadau-haf-2022-holiadur-crynodedb.pdf>

Bydd CBAC yn ystyried y materion hyn drwy'r broses ddyfarnu ac fel rhan o'n rhaglen fonitro byddwn yn arsylwi cyfarfodydd dyfarnu lle mae pryderon wedi'u codi a bydd CBAC yn adrodd i ni ar y camau y byddant yn eu cymryd. Lle mae pryderon wedi'u codi mewn perthynas â pha mor anodd oedd y papurau arholiad, er enghraifft mewn Cemeg Safon Uwch, bydd CBAC yn ystyried gofynion y papur wrth osod ffiniau'r graddau. Yn achos Saesneg Iaith a Llenyddiaeth Saesneg Safon Uwch lle bu gwall hysbys wrth goladu papurau arholiad, bydd CBAC yn ystyried yr effaith ar ddysgwyr ac yn cymryd camau i sicrhau nad ydynt dan anfantis cyn belled ag y bo modd.

Mae'r papur arholiad UG Mathemateg cyntaf (Uned 1) wedi cael ei archwilio'n arbennig. Rydym eisoes wedi gofyn i CBAC adolygu'r cwestiynau y codwyd pryderon ynglŷn â nhw a darparu adroddiad i ni. Yn ogystal, rydym wedi gofyn i ddau arbenigwr pwnc annibynnol adolygu'r papur a rhoi adborth i ni ar yr honiadau na ddylai rhai o'r cwestiynau fod wedi ymddangos gan eu bod wedi'u tynnu o'r gofynion asesu. Rydym wedi eu rhannu â CBAC ac yn ystyried pa gamau sydd angen eu cymryd, er enghraifft dileu'r cwestiynau hyn o'r papur.

Rwy'n gobeithio y bydd hyn yn rhoi rhywfaint o sicrwydd i'r pwyllgor bod y materion hyn yn cael eu hystyried a byddwn yn darparu rhagor o fanylion i chi erbyn 7 Medi yn ôl y gofyn. Rwyf wedi copïo CBAC a Gweinidog y Gymraeg ac Addysg i'r ymateb interim.

Yr eiddoch yn gywir



Philip Blaker
Prif Weithredwr